



06. Maj 2019

UPA 2019/43
Aqqalu C.Jerimiassen

Meeqqat Atuarfianni atuartut akornanni pimmatiginnittarneq pinaveersaartinniarlugu periusissiamik kingusinnerpaamik UPA2020-mi saqqummiunneqartussamik Naalakkersuisut peqquneqarnissaannik Inatsisartut aaliangiiffigisassaattut siunnersuut. Periusissiap atuutsinneqalernissaanut suliniutit assigiinngitsut qaqugukkut aallarnisarneqarnissaanut piffissalersuut ilanngunneqassaaq.

(Inatsisartunut ilaasortaq Aqqa Samuelson, Inuit Ataqtigiit)

Qanorluunniit ukioqaralarutta nuannaarluta toqqissisimasuunissarput ulluinnarni inuunitsinni atorfissaqartipparput, meeqqureviliarnissaq, atuariartornissaq, atuareernerup kingorna ornittagaliarnissaq inersimasunngoraannilu suliarternissaq tamarmik orniginartuusariaqarput.

Qinngasaarisarneq qangaaniilli tusartuagarilerparput, immaqalumi maanna maani inersuarmitugut minitaasoqarata nammineq qinngasaangaasarnikuunngikkutta qinngasaarisarnikuulluta.

Tassanngaanniilli Atassummiik isumaqarpugut toqqaanaq inuiaqatigiinnut oqartariaqarluta: angajoqqaatut akisussaaffitsinnik aamma uagut nammineq inuiaqatigiittut suliaasaqarpugut annertuumik, uagummiuna angajoqqaatut meeraq akisussaaffipput. Ilinniartitsisunut qinikkanullu tutsitsiinnartarneq naliginnaavallaalersimavoq, ilinniartitsisorpassuaqarpormi qasuttueqalutik ullaat tamaasa makittartunik atuartikkiartorlugit meerartagut.

Pimmatiginnittarneq qinngasaarisarnerlu periusissiornissamik siunnerfeqarneq namminermini ajortuunngilaq, taamaattorli Atassummiik oqaatigerusupparput periusissiat allallu aqqusaqqaarpallaanngikkaluarlugit ilinniartitsisugullu ulapereeqisut qaavatigut artukkerniaqqinngikkaluarlugit uagut angajoqqaajusugut immitsinnut qiviaoqaartariaqartugut allat tikkuartorpallaalersinnagit. Angerlarsimaffik toqqissisimanartoq, angajoqqaat meeqqaminnut kaammattuisut asannittullu aqqutissaapput pimmatiginnittarnerup meeqqat akornganni minnerulersinnissaannut. Unalu taaqqikkusunnarpoq taamaattumik siuliani taareersimasarput Atassummiik, meeqqamut killiliineq ajortuunngilaq, meeqqamulli asanninneruvoq.

Taamaattorli aamma inersimasunut saatilaanngitsoorusunnangilaq meerartatsinnut akisussaaffinnik pimmatiginnittarnermut akiuiniarnissamut oqalulersilluta. Uagummi inersimasorsuusugut aammattaaq immitsinnut qiviartariaqalivissoqqagatta ullutsinni inooriaatsitsinnut. Ajornaqaarmi meerarlu qinngasaarisarnermik pimmatiginnittarnermillu peqqunagu illuani mobilerput tigullugu kikkut tamaasa facebookikkut akerartuutariniarlugillu akisussaassusilimmik iliuseqarnerunngilaq. Ullutsinni ajoraluartumik inuiattut nassuerutigisariaqalerparput oqallittariaaserput meerartatsinnut takussutissatsialaanngimmat, tassami inersimasut akornganni socialmediakkut akerartuunnerit, nikanarsaanerit, nakkarsaanerit illaruaatiginninnerillu ulluinnarsiutigilersimavagut, oqaatigeqqillaralu sooq taava meeqqagut kaammattussagatsigit uffa nammineq uagut



pitsaanerunngivilluta iliutitsigut. Ilinniartitsisunut qinikkanullu akisussaaffik periusissiornikkut tapersernaraluartoq siullermik angajoqqaajusugut akisussaaffimmik tiguseqqaarnissarput pisariaqarpoq, uagummi angajoqqaajusugut nammineq iliuseqqaanngikkutta periusissiat asuli pappiaraannaassapput kusanartumik allatat.

Minnerunngeqisumilluttaaq Atassummiit tikkuarusupparput, maani inersuarmituusugut innuttaasut qinigaattut kiffartortussatut qinerneqarsimasugut pissuserissaarnermut unneqqarinnermullu maligassiuisuusariaqaratta. Oqallittarnerput arlalitsigut tusarsaavallaaleriartorpoq sammiveqanngilluinnartumik ilaatigullu akisussaaffimmik qimarratiginnittarnermik tusaqusaarnerpassuarnillu imaqartalersimasoq. Periusissiat allallu tamaasa pilersinnagit ila aamma uagut maani inersuarmituusugut innuttaasunut nunatsinniittunut kiffartortuusugut maligassiuinissamik siullermik takutsitsineq ilikkaqqaartariaqarparput, tassuunakkuttaaq meerartatsinnut pimmatiginnittarnermik akiuniarnermut maligassieqataasinnaarpalaartutut isikkoqalissagatta.

Taamatut Atassummiik oqaaseqarluta siunnersuut ataatsimiitsitaliami susassaqtumut innersuupparput.